




Foto: Thomas de Lange/Wenck

**Status og råd**

Bestanden av vanleg uer har hatt sviktande rekruttering sidan tidleg på 1990-talet. Toktresultat og fangstraratar frå trålfisket viser ein klar nedgang og at bestanden no er mindre enn nokosinne. Eit sterkt yngelvern er viktig for å sikre rekruttering og at bestanden blir bygd opp att. Vanleg uer er klassifisert som sterkt trua art på den oppdaterte norske raudlista som kom ut i 2010. Nye og oppdaterte data (frå fiskeri og tokt) endrar ikkje ICES si bestandsvurdering.

**Fiskeri**

Fisket etter vanleg uer blir regulert ved hjelp av bifangstreglar, fredingstid og i mindre grad også reiskapsregulering. Årsklassane det siste tiåret har vore svært svake, og mengda av umoden fisk går stadig nedover. Situasjonen er venta å vare i mange år. Ei tilsynelatande lita betring i rekrutteringa dei siste åra er usikker og treng nærare stadfesting. På denne bakgrunnen tilrår ICES strengare reguleringar. Reguleringstiltaka i dag er utilstrekkelege. ICES gjentek rådet om stopp i alt direkte fiske, utvida freding og skjerpa bifangstreguleringar for trål. Fangsten i 2011 vil bli kring 6 500 tonn. Rapportar frå fiskarar tyder på at fredinga har ført til lettare tilgjenge av vanleg uer, noko også ei viss betring av fangstraratane hos trålarane viser. Noreg har dei siste tiåra tatt 80–90 % av totalfangsten av nordaustarktisk vanleg uer. Bortsett frå Russland, fiskar alle andre land årleg mindre enn 100 tonn (figur). Trål og garn er dei viktigaste reiskapane. Direkte fiske vil i 2012 berre vere tillatt med konvensjonelle reiskapar (garn, line, jukse og snurrevad). Fredinga har blitt utvida, og det direkte fisket vil berre vere ope i knapt fire månader, bortsett frå for juksefartøy som kan fiske heile året. Tillatt bifangst i fredingstida har imidlertid blitt auka frå 20 til 25 %, rekna over ei veke. Så lenge det ikkje er sett sikre teikn til betring i yngel- og ungfiskførekommstane, er dagens fiskeri med gjeldande reguleringar ikkje berekraftig.



100 års fangsthistorie for nordaustarktisk vanleg uer (*Sebastes marinus*).  
Catches of *Sebastes marinus* since 1908.

**Vanleg uer – *Sebastes marinus***

**Familie:** Scorpaenidae

**Maks storleik:** 1 meter og meir enn 15 kg

**Levetid:** Over 60 år

**Leveområde:** 100–500 meters djup i Nordsjøen–Barentshavet, også i norske fjordar

**Hovudgyteområde:** Vesterålen, Haltenbanken, Storegga

**Gytetidspunkt:** April–mai

**Føde:** Plankton viktigast dei første leveåra.

Deretter større plankton og fisk

**Særtrekk:** Ueren ynglar, dvs. han “gyt” levande larvar

**Nøkkeltal:**

**KVOTERÅD 2012:** Ingen direkte kvoteråd, men strengare vernetiltak må innførast

**FANGST 2011:** Norsk fangst vel 5 000 tonn, samla internasjonalt fangst ca. 6 500 tonn

**NORSK FANGSTVERDI 2011:** For begge uerartane samla, ca. 110 millioner kroner.



**Fakta om bestanden:**

Vanleg uer føder levande 4–6 mm yngel i april–mai. Paringa føregår om hausten, og i yngleområdet om våren kan det difor vere reine hofiskkonsentrasjonar. Som toåring er vanleg uer 10–12 cm, og frå no av veks han om lag 2 cm per år til han blir kjønnsmoden. Som 11–12 åring og 30–35 cm lang, er halvparten av vanleg uer kjønnsmoden. Vanleg uer lever på 100–500 meters djup på kontinentalsokkelen, langs kysten og visse stader inne i fjordane. Han er utbreidd nord til nordvest for Spitsbergen, men finst sjeldan i fiskbare mengder nord for Tromsøflaket/Bjørnøya. Yngleområdet strekkjer seg langs Eggakanten og kontinentalsokkelen frå Shetland og nordover til Andøya, med Storegga, Haltenbanken og Vesterålen som dei viktigaste områda. Vanleg uer lever utelukkande av dyreplankton i dei første leveåra. Deretter går han over til krill, lodde, sild og torskefisk. Som byttedyr er småueren viktig føde for torskefisk og kveite. Det er ikkje påvist endringar i gytealder, produksjon eller utbreiing som følgje av endringar i klima. Dei siste par åra er det rett nok gjort gode bifangstar av vanleg uer så langt nord som ved Bjørnøya.